

URDHËR
Nr. 54, datë 14.11.2025

**PËR DELEGIMIN E KOMPETENCAVE DHE CAKTIMIN E DETYRAVE TË
ZËVENDËSMINISTRIT TË EKONOMISË DHE INOVACIONIT, znj. BLERTA
RAMA**

Në mbështetje të pikës 4, të nenit 102, të Kushtetutës së Republikës së Shqipërisë, të ndryshuar; të neneve 22, 28 dhe 29, të ligjit nr. 44/2015, “Kodi i Procedurave Administrative të Republikës së Shqipërisë”; të neneve 3, 5, 11 dhe 15, të ligjit nr. 90/2012, “Për organizimin dhe funksionimin e administratës shtetërore”; të pikës 2, të nenit 6, të ligjit nr. 9000, datë 30.1.2003, “Për organizimin dhe funksionimin e Këshillit të Ministrave”, si dhe të vendimit nr. 516, datë 25.9.2025, të Këshillit të Ministrave, “Për përcaktimin e fushës së përgjegjësisë shtetërore të Ministrisë së Ekonomisë dhe Inovacionit”,

URDHËROJ:

1. Delegimin e kompetencave të titullarit të Ministrisë së Ekonomisë dhe Inovacionit, zëvendësministrit të Ekonomisë dhe Inovacionit, znj. Blerta Rama, për ushtrimin e kompetencave në fushat e përgjegjësisë, si:

- a) politikat dhe programet e strehimit social;
- b) politikat, procedurat dhe monitorimin e kontratave të partneriteteve publik–privat dhe të koncesioneve, të cilat janë pjesë e fushës së përgjegjësisë së ministrisë;
- c) politikat e administrimit të pronës shtetërore, privatizimit dhe drejtimit të pronës publike;
- d) politikat që lidhen me shoqëritë tregtare dhe ndërmarrjet shtetërore;
- e) politikat dhe zhvillimin e zonave ekonomike dhe teknologjike.

2. Në ushtrimin e kompetencave të titullarit të Ministrisë së Ekonomisë dhe Inovacionit, sipas pikës 1, të këtij urdhri, zëvendësministri ngarkohet të ndjekë, monitorojë, koordinojë me institucionet e varësisë, agjencitë autonome, drejtoritë në përbërje të ministrisë dhe të përgjigjet përpara ministrit, mbi:

- a) hartimin dhe zbatimin e politikave të strehimit;
- b) sigurimin e transparencës për çdo proces të shitjes së pronës publike përpara vendimmarrjes së ministrit dhe zbulimin e parregullsive apo dëmeve të shkaktuara në pronën e njësive publike;
- c) procedurat e përgatitjes, dhënies dhe monitorimit të kontratave të koncesioneve dhe partneriteteve publik–privat, të cilat janë pjesë e fushës së përgjegjësisë së ministrisë;
- d) orientimin dhe harmonizimin e veprimtarisë për zhvillimin e partneriteteve publik–privat dhe koncesioneve;

e) hartimin dhe zbatimin e politikave për administrimin e pronës shtetërore dhe privatizimin;
f) hartimin dhe zbatimin e politikave për shoqëritë tregtare dhe ndërmarrjet shtetërore;
g) hartimin dhe zbatimin e politikave për zhvillimin e zonave ekonomike dhe teknologjike.

3. Në ushtrimin e kompetencave të titullarit të Ministrisë së Ekonomisë dhe Inovacionit, sipas pikës 1, të këtij urdhri, zëvendësministri ngarkohet të kryejë mbikëqyrjen e performancës dhe raportimet periodike të institucioneve të varësisë dhe agjencive autonome:

- a) Enti Kombëtar i Banesave (EKB);
- b) Agjencia e Trajtimit të Koncesioneve (ATRAKO).

4. Zëvendësministri, sipas kompetencave dhe detyrave funksionale të deleguara në fushat përkatëse të përgjegjësisë, është përgjegjës edhe për mbikëqyrjen, lidhur me:

a) Strukturën e negociatave dhe bashkërendimin e qëndrimit negociues për secilin kapitull brenda fushës së përgjegjësisë së ministrisë, të *acquis*, përpara miratimit nga Këshilli i Ministrave;

b) masat e përcaktuara në Agjendën e Reformave brenda fushës së përgjegjësisë së ministrisë, duke siguruar koordinimin dhe harmonizimin e tyre përpara miratimit nga Këshilli i Ministrave;

c) procesin normativ, si dhe bashkëpunimin ndërkombëtar për projektet e huaja brenda fushave të përgjegjësisë;

d) procesin e hartimit dhe ndjekjen e procedurës për miratimin në Këshillin e Ministrave dhe Kuvend të projektakteve ligjore/nënligjore në fushën e përgjegjësisë shtetërore të ministrisë, si dhe të proceseve në kuadër të PKIE-së.

5. Institucionet e varësisë, agjencitë autonome dhe drejtoritë në përbërje të Ministrisë së Ekonomisë dhe Inovacionit raportojnë detyrimisht 1 herë në muaj dhe, rast pas rasti, sipas kërkesës të zëvendësministrit për çështjet që janë specifikuar në këtë urdhër, pa cenuar pavarësinë operationale të tyre.

6. Zëvendësministri raporton me shkrim te ministri për zbatimin e detyrave të caktuara në këtë urdhër sipas kërkesës së ministrit dhe detyrimisht 1(një) herë në javë për detyrat afatshkurtra dhe 1 (një) herë në muaj për detyrat dhe përgjegjësitë e deleguara sipas këtij urdhri dhe ato të parashikuara në legjislacionin në fuqi.

7. Zëvendësministri, sipas parashikimeve të këtij urdhri, autorizohet të nënshkruajë:

a) akte shkresore të iniciuara në nivel zëvendësministri brenda fushave të përgjegjësisë, si dhe ato në përmbushje të marrëveshjeve të nënshkruara;

b) akte shkresore që lidhen me plotësimin e detyrimeve që rrjedhin në cilësinë e tij të anëtarit apo kryetarit të grupeve të punës;

c) çdo shkresë/akt/procedurë shkresore tjetër me autorizim të posaçëm të ministrit.

8. Çdo akt tjetër që vjen në kundërshtim me këtë urdhër, shfuqizohet.

9. Delegimi i kompetencave mbaron me shfuqizimin e aktit të delegimit, si edhe me pushimin e ekzistencës së organit delegues ose të deleguar.

10. Ngarkohen zëvendësministri, znj. Blerta Rama, institucionet e varësisë, agjencitë autonome dhe drejtoritë e aparatit në përbërje të Ministrisë së Ekonomisë dhe Inovacionit për zbatimin e këtij urdhri.

11. Ngarkohet Sektori i Arkiv-Protokollit për njoftimin e këtij urdhri.

Ky urdhër hyn në fuqi menjëherë dhe botohet në Fletoren Zyrtare.

MINISTËR I EKONOMISË DHE INOVACIONIT
Delina Ibrahimaj